

BERDAD NUNCA
A PERJUDICA
NINGUN HENDE
NINGUN CAUSA
NI NINGUN
NACION.....

DIARIO

E MATUTINO DI ARUBA

DIASABRA 6 DI APRIL 1991

ABONADO PA LUNA AFI. 19,00 ** PA EJEEMPLAR 0.80 AÑA10/NO.3297

MEP Ta Busca Manera Pa Defende Coastal Di Tur Forma

Un trip na Estado Zulia



Ayeramainta e diez candidatanan cu lo participa den e certamen di Miss Aruba dia 27 di April, a sali abordo di e avioneta Blenchi di Air Aruba rumbo pa Punto Fijo, unda nan lo pasa e fin di siman aki den un programa extenso. Por mira aki for di riba e trapi bay abao Liza, Monique, Terry, Saskia, Maruta, Lisa, Janira, Sandra, Jerusha, y Miluska. Akinan por mira Frank Arends kende ta Duty Station Manager di Air Aruba para banda di Maruta. Air Aruba a regala e pasashinan aki. DIARIO su fotografo campeon tabata presente riba plataforma di aeropuerto pa capta e potret aki, danki na e bon cooperacion ricibi di e funcionarionan Rudy de Kort y Adriaan Albertsz. Na e candidatanan ta bay nos deseonan di bon viahe.

DYNASTY A YEGA
DEN STRADA COMPLEX NOBO STOCK NOBO

Cantidad di hende a cuminza subi Hooiberg

ORANJESTAD (AAN): Despues cu e siman aki e trapi di Hooiberg a ser "reinaugura" oficialmente, DIARIO por a nota cu actividad pa loke ta trata subimento di esaki a aumenta drasticamente.

Hopi hende naturalmente mesora a haya e deseo di bay mira con e trapi a keda, y un fuente a revela cu ta hopi hende cu nunca antes a subi e cero aki a probecha di e trapi nobo.

DIARIO a entrevista un persona kende a splica cu tur atardi e tin costumber di subi e cero aki como parti di su ehercicio. El a muestra cu antes e trapinan aki tabata den hopi mal estado, como cu tin algun hende cu mal mente cu ta laga piedranan grandi lora for di na halto te abao y esaki ta kibra e cement.

Pa loke ta trata e condicion cu e trapi ta aden awor, el a muestra cu e por haci ehercicio awor un tiki mas safe. Pero un desventaha ta cu awor mas cu nunca e lo encontra mas hende pareu riba e trapinan, sea ta subi of baha, y pues por spera un trafico pisa di peaton riba e trapinan aki.

Algo cu falta ainda na e pia di e cero ta siquiera algun iluminacion, ya cu DIARIO ta kere cu seguramente esaki lo por descurasha vandalismo.

Ademas di tur esaki, DIARIO a ricibi e informe exclusivo cu tin plannan prepara caba pa lanta un grupo cu lo dedica su mes na entrena y subimento di e cero aki. Nan a splica cu si e club aki worde forma, nan lo por worde contrata tambe door di p.e. e radio-emisoranan cu tin aparatonan pisa di antenna y transmisor riba e cero, pa nan carga e piezanan aki y hisa of baha nan riba Hooiberg.

Seguramente por spera cu Hooiberg lo por bira un atraccion turistico tambe den futuro cercano y mirando e hecho cu eybanda tin amplio lugar pa staciona auto y e ta keda "un tiki isola" di e mundo por pensa cu esaki sigur lo bira e caso.

Cooperacion di tur partnernan di Reino ta laga hopi di desea

ORANJESTAD (AAN): Profesor van der Grinten durante hopi aña a significa hopi pa Antiyas, Universidad di Antiyas, y pa Aruba y Universidad di Aruba. E ta un experto riba hopi tereno juridico, entre cual e futuro estructura estatal di Reino Hulandes. Den un declaracion el a muestra cu awor e otro islanan di Antiyas tin Status Aparte dilanti nan, un situacion delicado a aparece.

Awor e partnernan di Reino mester bay delibera riba e estructura estatal desea. Antiyas di cinco ta menazando di kibra di otro. E deseonan di e partnernan di Reino pa un estructura nobo no ta coriendo igual. Esaki lo por significa un perdida di poder di accion pa loke ta trata e tratamiento preferencial di Aruba-Hulanda-Antiyas den un laso cu Comunidad Europeo y un Europa uni for di 1992.

E cooperacion di ambos partnernan di Reino den Caribe ta lagando masha hopi di desea y ta esensial pa genera e fuerza di accion gubernamental necesario.

E doble nivel di gobernacion na Antiyas lo por traha den forma di retrazo tambe.

"Algo mester cambia den e estructura di Reino, pero kico mester cambia, riba esey e opinionnan di e politiconan y expertonan ta diferencia fuertemente di otro. Aruba lo por hunga un rol importante den e formacion di opinion necesario, mescos cu Antiyas." E restructuracion di Antiyas y e posicion di Aruba eyden lo mester worde mira cu wowo y Profesor van der Grinten tin pesey un contesta. Segun DIARIO a compronde, pa e duna e splicacion aki el a dicidi di organiza un anochi di lectura hopi interesante y importante Diahuebs anochi na e aula di Universidad di Aruba.